

Bernhard's Geschichten (Seite 1+2 😊)

Die erschti Gschicht die isch grad dopplät
dä Bernhard Stefan hät grad dopplät g'mopplät
die erschti Story isch wie folgt passiert
im Stefan häts wieder mol prässiert
är hät mit sim Auto zum Otto wellä
was är döt hät wellä chönd mir nid genau verzellä
schienz numä öppis chliesäs flickä
drum tuet in d'Frau id Garage Höfli schickä.
Doch leider isch bim Höfli die Iefahrt chli äng
dä Steff liet id Kurfä und scho machts Päng
är hät im Rank dä Stei überseh
än Chratz, än Knall är schreit ohjeh
und so mues dä Otto dän nid numä schnäll schauä
sondern au no die grossi Büülä usähauä.

(äs zweiti Kapitel isch eigentlich äs Duett über zwei Sietä)

Bi dä zweitä Gschicht do hät dä Stefan tänkt
ich mach öppis guets und hät im Schatz än Staubsuuger gschänkt
die hät sich riesig gfreut hät ihn grad usprobiert
doch hät sie öppis nid kapiert.
Sie hät dä Suuger zämä g'schtellt
und X-mohl alli Teili zellt
doch s'Büechli seit, äs fählt äs Teil
da findät Thiwa gar nid geil.
Sie lüütät sofort im Stefan ah
und seit zu im „du liebä Maa,
das Teili mues no i dä Schachtlä sie,
bitte lueg doch nomol drie“!
Doch dä Stefan hät die Schachtlä scho mulderisiert
drum sinds dän beidi ziemlich fruschtriert,
doch do chunt im Stefan die goldig Idee



ich chönt jo die Schachtlä wieder zur Muldä usäneh
är sprinttät zum Brüeder da isch jo dä Gmeindsarbeiter
und seit zum Felix „bitte hilf mir sofort weiter,
mach s'Tor und d'Muldä nomol uf,
susch macht mini Thiwa dihei äs riesä Puff“.
Dä Felix cha jo sin Brüeder nid hangä loh
hät sofort alläs gheiä loh,
isch mit äm Steff id Muldä ie g'chrochä
hät däbie fascht d'Chnochä prochä.
Di ganzi Muldä händ sie müesä durwüelä
häsch äs mängmohl ghörä brüelä
doch noch langäm suechä und bangä Stundä
händ sie dän die Schachtlä gfundä.
Doch oh Schreck die Schachtlä isch läär
äs ganzi für d'Füchs, da isch nid fair,
so goht dä Stef dän halt hei, mit hängendem Chopf
mues die Nochracht verzellä dä armi Tropf.
Doch dihei empfängt ihn än riesiegä Meis
Thiwa lauft mit äm Staubsuuger im Kreis
isch ganz fridlich am Bödä entstaubä
dä Steff tuet sinä Augä nid glaubä.
Är rüeft zu dä Thiwa, „wieso lauft jetzt dä Siech, äs isch doch zum fluechä,
ohni das Teili wo mir so lang händ müessä suächä“?
Sie seit dän ganz locker „ich ha äbä gseh,
das äs vo däm Suuger zwei Model tuet geh,
das Teili wo Ihr händ müesä suechä
tuets nur bim anderä Model bruchä“.
Und dä Steff seit „jo Herrgott warum lüütisch dän nid ah???“
do druf abä hät är glaub grad äs Bierli müessä ha.

Bernhard' Geschichten zum zweiten

Dä Andrin Bernhard hät au mol wellä
dihei sälber chochä, nid nur ä Pizza pschtellä
d'Eltärä furt, das isch grad guet
är nimmt ä Pfannä, isch voller Muet
doch das die Pfannä dänn heiss wird bim chochä
hät är erscht gmärkt wo sini Finger händ g'rochä
är hät sich grüüselig d'Finger verbrännt
isch vor luuter Schmerz i dä Chuchi umä g'rännt
isch umä gumpät wie än Ball
do gits vor luuter au no än riesä Knall
är schloot vor luuter gumpä dä Grind no aah
jetzt weiss är gar nümmä dä jungi Maa
söll är jetzt johlä wäg dä Bühlä am Chopf
oder wäg dä verbränntä Finger, dä armi Tropf.

Kabelbrand im Raclettstand

Am Raclette Nomittag tuet mä Raclette chochä
da isch jo logisch, nur das mol häts grochä
im Werkgebäude isch mä gsässä
und hät so mäunge Raclette Chäs gässä
uf eimohl seit öppert „schmökkäd Ihrs au?
Das stinkt jo g'füürchig und wie nä Sau“.
Äs Räuchli stiegt uf us äm Kabelsalot
alläs verschmorät, sisch alläs scho tschpoht
dä Witz(-ig) isch am ganzä das tuen ich Eu sägä
das Gerold als Strohmer jo tuet die Kabel verlegä.

Ready for take off

Dä Philippe Walder, auch Waldi genannt
isch als begeischerätä Töfffahrer bekannt
so hät är dänn törfä im Summer im letschtä
ämohl go so schnälli Elektrotöff teschtä.

Uf ämä Flugplatz sinds go umäsauä
händ die Maschinä über die Pischtä ghauä
keis Tempolimit mit über 200 Sachä
jo do gsehsch dä Waldi lachä.

Und dänn zum Abschluss gits im no dä Reschtä
hät är no törfä äs Elektroauto go teschtä
aber keis normals, so än super Flitzer
dä Waldi würt jetzt immer spitzer.

Är pfurät über d'Pischtä inä
do rüefts übers Funkgrät i sini Ohrä inä:
„he du Spinner, fahr sofort uf d'Zietä
du chasch doch nid uf dä Startpischtä umärietä
do söt einä Startä mit sim Flugi sim chlienä
chasch jetzt nid eifach mit dim Flitzer erschienä“.

Do nimmt dä Waldi mit hochroter Nuss
all sini Ps dän zämä und voller Verdruss
hantli uf Zietä und fahrt mit därä Chischtä
vo jetzt ah nur no uf dä g'schpertsä Pischtä.



Schloofmützä

Dä Oski Bühler i dä Schuelstross obä
häscht letschti au mol ghörä tobä
am morgä früe no dä Schloof i dä Augä
mä cha die Gschicht jo fascht nid glaubä
wot är go schaffä go, go wärkä
nur tuet är leider gar nid märkä
das är äs Garagetor won är jo uf hät gmacht
hinder im wieder zue isch kracht
schienz isch är ohni das z'gseh
an Chnopf anächo und dänn ohjee
mit äm Auto retour zur Garage usgfahrä
durs zueni Tor das isch zum plahrä
äs Tor kabutt dä Charä au
und scho wieder sind äs par Höörli grau
dä Vorteil vo därä Gschicht, noch däm riesä Krach
isch dä Oski jetzäd wänigschtens wach.

Wenn zwei dasselbe tun, ist es nicht immer ganz das..... oder doch???

Am Chränzli händs jo müesä improvisierä
well im TV hät müesä än Fähler passierä
a dä Prob händ sie gmärkt und sind ganz schön verschrockä
das d'Männerriegä die gliche Nummerä tuet rockä
das isch ganz schön peinlich wännt das nid vorhär tuesch gseh
do nützt au nohhär keis juhee
aber zum Schluss ischs jo doch no guet usgangä
und mir dörfäd scho wieder ufs nöchsch Chränzli plangä

Schienz:

- hebs bi dä letschtä Nationalrotswahlä uf dä Gmeind nur ein ungültigä Stimmzettel gäh, dä vom Andi Bieler. Är hät dä Thomas Minder gwählt in Ständerot. Dä seg schienz schon no guet.
- heb dä Tschello am Schwägalpschwingä lieber ä chli än z'grossä Rägäschutz däbie, als einä wo au dicht isch.
- nimmt dä Tschello jetzt d'Badhosä au immer is Handgepäck. Well lieber verseicht am Schwingfäscht, we ohni Badhosä am Meer.
- tüends im Wasserschloss unnä äs Altpapier lieber scho ä Wuchä z'früe usä.
- heb dä Gmeindroht a dä Jungbürgerfier dä jungä alli Pokäl vor dä Nasä weggeschossä bim Tontubäschüssä.
- händs i dä Spitzwies än neuä Fuessgängerstreiffä bauä. Aber äs benutzt in keinä.
- verbrännt sich dä Dani Keller (s.Z. Ausbildungschef) a dä FÜRwehruëbigä ab und zue d'Händ a heiss gmachtä Türfallä.
- tuet dä Andi Plüss (s.Z. Atemschutz Off.) a dä FÜRwehruëbigä amäl no gärn Tüürfallä heiss machä 😊
- büütät ä dubiosi Immobiliäfirma z'Uhwiesä gärn Hüüser zum verchauffä ah wo gar nid zum verchauffä sind.
- riest dä Erika am Schüelerhilari dä Geduldsfadä gar nie. Däfür aber d'Hosä 😊 😊
- hät d'Andelfinger Zytig äs bitzeli müeh mit dä Vornämä vo sinä Chundä. Dä Erwin Meischer heisst plötzlich Thomas und äs Chrischtbaumwerfä gönnt dä Pascal Bieler.

Bernhards Geschichten zum dritten

Dä Felix üsen neuä Stroossäbetreuer
Pfadschlittä-Pilot und Chef-Salzstreuer
hät scho mol alli Hyderantä kontrolliert
und do debie isch im öppis passiert.
Är nimmt i dä Unot obä än Hydrant is Visier
bewaffnät mit äm grossä Schlüssel und äm Schriebpapier
doch wo är hinder dä Hydrant anätschumplät
do häts ihn plötzlich durä g'schüttlät
än Strohmschlag, s'haut ihn fascht us dä Sockä
hei nomohl isch dä Felix verschrockä
chunnt nümmä drus, ganz konsterniert
liet är am Bodä, tänkt, was isch au passiert?
Äs fällt im dän wie Schuppä vo dä Augä
mä chas jo würklich fascht nid glaubä
dä Zaun hinder äm Hydrant isch nämlich gladä gsieh
und dä Felix langät mit äm Hydrantäschlüssel genau döt drie.

Streuner

Im Steinerberg ussä chasch sit längerer Zyt
Schööfli zelle, sits die döt git
d'Gaby Winkler hät schienz drü so Viecher
nur segäts schienz chli Umäschliecher.
Die hauäd immer wieder ab
und haltäd d'Gaby so uf trab
im ganzä Quartier heb mäs schienz scho gsichtät
so händ üs verschieden Quällä prichtät
jo mit Hünd do meint sie jo, kännt Sie sich uus
aber bi Schööfli chunnt sie allwäg hallt nonid so drus.

Neophytentagung

Mir händ letschti mol, hei jupiohee
dä Rohrbach Serge i dä Zytig gseh
ha gseit zu dä Frau, „dä känni dä Maa,
dä tuet doch bi üs im Gmeindroht stah“
do seit sie zu mir, „jo dä känni au,
ä brüllä im Gsicht und d’Hoor ganz liecht grau.
Doch was macht dän dä Serge uf däm Bild in Schaffhuusä
und chunnt nid zu üs is Werkgebäude usä?
Döt währ jo au so än Neophytä Tag
zallt vo dä Gmeind, do stell ich mir d’Frag
wänn üsi Gmeind jo so öppis unterstützt
wo jo eigentlich üs allnä nützt
dän söt doch dä Gmeindroht sich au döttä zeigä
und nid dä Chopf richtig Schaffhuusä neigä?“
Und ehrlich gseit das find ich au schlächt
do hät mini Frau doch würklich wieder mol rächt.

Als Sie Sparmassna(h)men

Primarschuel mues jetzt doch no sparä
drum tüends bim Räbäliechtlumzug dä nöchi no fahrä
dä Chindsgi goht nümmä is Schuelhuus go singä
au Glüewyy tüends ä keinä me bringä
d’Primarschüeler söläd diheimä bliebä
dä Chindsgi wett under sich lieber bliebä
ä so das sägäd mir Eu do jetzt Füdläblutt
machäd Ihr au die schööni Tradition no kaputt!!!!!!

Schiessereiä

Hüt bisch jo nur inn wännt än Hund tuesch chauffä
und mit däm Tierli tuesch durs Dorf durä lauffä
öb Labrador öb Mops ob Schööffer
än Hund mues äs sie, für die Sibäschlööfer
die meischtä die luegäd au guet zu däm Tier
doch gits ä so Fäll das säg ich Dir
die schickäd das Tierli wells sälber z'fuul sind zum chruckä
eifach vor d'Türä zum dä Gaggi usätruckä
und die tüend dänn halt, well sies nid andersch tüend kännä
im Nochber im Gartä umä rännä
schiessäd überall anä, wos grad usäwot
und liggä bleibt dänn dä Hundekot
Pascal Graf die heb schienz äs sonäs Veh
wo no nie äs Robidog Säckli vo nöchem heb gseh.

Kei Moscht meh

Dä Zoller Jürg händ mir mol gseh
hät i sim Töff keis Möschtli meh
go tankä mues är dringend jetzt
und hät sich uf sin Hobel gsetzt
in Volg uefahrä schnäll parkiert
d'Chartä in Automat, doch s'isch nüt passiert
är tuets dän no zwei drei mohl versuechä
und plötzlich ghörsch in afangä fluechä
isch ächt dä Chaschtä öppä nümme guet
oder öb ächt mini Tankchartä nümme tuet
erscht spööter hät är mit schreckä dänn gseh
do häts jo sit zwei Monät gar kei Tanksüülä meh.

Wildwescht

Dä Ruedi goht mol über dä Rhy
und ladät döt ännä sini Rindli ieh
doch zwei händ gar nid heimä wellä
die tüend sich ziemlich bockig stellä
siechäd furt, so schnäll wies chönd
bevors irgendwänn dänn vor dä Schlachtbank stönd
ab uf d'Pischtä, furt mit Schadä
sicher nümmä dihei in Gadä
vo Neuhuusä us bis is Schwoobäland
mir findäd das jo isch allerhand
doch simmer mol ehrlich und dänkäd mol drah
uf zwei Rindfiecher meh, chunnts döt ännä au nümm druf ah.

Der Fall vom Haarausfall

Dä Bieler Andi hät jo nümmä viel Hoor
hät zwor immer än Huet ah, aber das isch scho wohr
jetzt hät är das Problem mol chönnä teschtä
vomä Expertä, und zwor grad vom beschtä
dä hät das ganzi undersuecht
und hät die reschtlichä Höörli gsuecht
är hät gmeint do hilft nur no chräftig bürschtä
die Höörli tuets noch liebi dürschtä
dä Andi meint dänn ganz fruschtriert
das hani jetzt nid ganz kapiert
är frogt sich und tuet mit sich ringä
was äs bürschtä am Änd i dä Hoor söll bringä???

Umhauen dann umbauen

Wänn dä Förschter mol än Baum fällä tuet
dänn chunt das meischten au ganz guet,
doch letscht Johr hät ärs au ämol probiert
und leider isch dänn öppis passiert.
Im Rhyfall unnä wot Schiff tüend ahleggä
händ sie wellä än grossä Baum umleggä,
äs isch nid eifach, är stoht chli chrum
drum stönd sie zerscht mol dringelum.
Sie tüend mol hin und her überleggä
wie sie das Teil ächt um söläd leggä.
Dä einti meint „mir müend in fixierä“,
dä ander wot das nid rächt kapierä.
„Dä gheit dän scho in freiä Ruum,
jetzt nid lang schnorä, jetzt tüend mir än um!“
Äs Machtwort spricht dä Chef, dä gross
ja nu so dänn, sie legäd los,
doch oh Schreck, s'isch wie scho tänkt
dä Baum i di falschi Richtig länt
än Rumpel tuets, dä Baum isch glägä
nur leider uf äm Gländer äbä.
Äs ganzi Gländer isch chrum und verbogä
und dä Hansueli häsch ghörä vo wietem scho tobä.

